

# UVODNA RIJEČ

## EDITORIAL

Poštovani čitaoci,

Uvodnik ovog broja Geodetskog glasnika je u potpunosti posvećen obljetnici od izuzetnog značaja za cjelokupnu geodetsku zajednicu u Bosni i Hercegovini, a riječ je o velikom jubileju 50 kontinuiranih godina univerzitetskog studija geodezije na Građevinskom fakultetu u Sarajevu. Obrazovanje geodetskih kadrova bila je stalna briga Saveza geodetskih inženjera i geometara Bosne i Hercegovine (danas SUGGSUBIH), tako da je Savez bio uključen u sva ključna pitanja geodetskog školstva tokom socijalističkog poretka u BiH. Savez GiG BiH je krajem 1970. godine aktuelizirao osnivanje studija za sticanje visoke stručne spreme u BiH i pokrenuo to pitanje kod Republičke geodetske uprave BiH. U tom periodu, diplomirani geodetski inženjeri činili su svega 7 % ukupnog broja geodetskih stručnjaka u BiH. Za pokrivanje tadašnjih i projiciranih potreba za takvim kadrom morao je hitno biti osnovan odsjek za obrazovanje geodeta sa visokom stručnom spremom. Dinamičke aktivnosti provedene početkom 1970-ih urodile su plodom te Savezu i Republičkoj geodetskoj upravi pripadaju najveće zasluge za utemeljenje visokoškolskog obrazovanja geodetskih kadrova, koje je prvi put u historiji BiH omogućeno kroz osnivanje Geodetskog smjera na Građevinskom fakultetu Univerziteta u Sarajevu. Treba istaći da je studij geodezije pokrenut kao goruća, prijeka potreba BiH i od samog početka je imao svoju punu društvenu, stručnu i naučnu opravdanost. Na svom pedesetogodišnjem putu, studij geodezije je u prvom razdoblju bio organizovan u okviru Katedre za geodeziju, koja se poslije transformisala u Katedru za geodeziju i fotogrametriju i Katedru za višu geodeziju i kartografiju, potom u Odsjek za geodeziju i naposljetku u Odsjek za geodeziju i geoinformatiku Građevinskog fakulteta Univerziteta u Sarajevu. Dakle, današnji Odsjek je izrastao iz Katedre za geodeziju formirane na Građevinskom fakultetu 1961. godine, a koja je nastala iz Geodetskog kabineta ustanovljenog na Tehničkom fakultetu u Sarajevu još 1949. godine. To svjedoči o dugoj tradiciji geodetske univerzitetske nastave u Sarajevu. Geodetski odsjek Građevinskog fakulteta u Sarajevu uvijek je predstavljao kolijevku moderne, naučnoistraživačke i obrazovne geodetske teorije i prakse, i to ne samo u okvirima BiH, nego i šire, jer su i mnogi izvan BiH ovdje sticali svoje diplome. Brojni su kvalitativni i kvantitativni pokazatelji koji svjedoče o dinamičnom razvoju Odsjeka, njegovom plodnom nastavnom i naučno-istraživačkom radu, od kojih ovdje samo navodimo da je tokom ovih 50 godina diplomiralo gotovo 1000 studenata, 8 kandidata je steklo zvanje magistra nauka, a odbranjeno je i 12 doktorskih disertacija. Odsjek je stasao u prepoznatljivo središte i rasadnik proučavanja svih oblasti geodezije i na njemu se uspješno provodilo intelektualno i stručno formiranje budućih geodetskih kadrova, koji su se pokazali uspješnim stručnjacima i naučnicima, dajući svoj značajni doprinos geodetskom sektoru u BiH i drugim zemljama. Stoga jubilej nije samo značajna obljetnica ovog Odsjeka, Građevinskog fakulteta i Univerziteta u Sarajevu, nego predstavlja datum od prvorazrednog značaja u historiji razvoja geodezije u BiH i šire.

Savez udruženja građana geodetske struke BiH i Odsjek za geodeziju i geoinformatiku su u posljednjih pola stoljeća izuzetno dobro saradivali. Između ostalog, Odsjek je zaslužan za redovno izdavanje časopisa Geodetski glasnik, najznačajnije periodične publikacije vezane za geodetsku nauku i struku u BiH. Još od 1983. godine Uredništvo časopisa se nalazi na Odsjeku, a od tada su svi glavni urednici Geodetskog glasnika bili upravo profesori sa Odsjeka za geodeziju (i geoinformatiku) Građevinskog fakulteta u Sarajevu.

Gledajući današnji najmlađi naraštaj asistenata na Odsjeku, te zrelost i vrsnost profesora, materijalne i prostorne kapacitete, uz iskrene čestitke povodom velikog jubileja, vjerujemo u još bolju budućnost Odsjeka, kao akademskog i istraživačkog središta geodezije u Bosni i Hercegovini.

*Nedim Tuno*